

Thomasvaer & Pieternel 2011.

**Veurig jaor perbeerde Jasper Glass vanuut Haarlem naor de ni'jjaorsreceptie te gaon.
Maar helaas op 't spoor bi'j Hilversum leuten ze de trein stillestaon.
Jasper, zelf ok warkzem bi'j de spoorwegen,
Docht, zoe'n storing hooft mi'j niet tegen.
Hij vreug toestemming om het mankement te meugen bekijken.
En hij hadde, zoas altied, genog gereedschap bi'j zich, dee doe blieken.
Het lokte hum de trein te plakke te rippereren.
En zo kon hi'j nog krek op tied op De Hoeve teroggekeren.**

Ok broer Jeroen is stark in dingen te rippereren.
Wim vertelde oons, en dit is zeker en vast.
Driekwart van de stoelen waar jim now op zitten bin deur Jeroen in mekere last.

**Punt iene. Wat is er nao de ni'jjaorseceptie van 2011 as eerste geschied.
We gaon nog evenpies mit zien allen terogge in de tied.
Niet Marie, maar Henk Hofstra wol as eerste terogge naor huus.
Maar Marie gaf jammergenog niet thuus.
In plak van naor een biertien te smachten,
Zat die arme Henk meer as een kertier, mit de jasse onder de aarm op Marie te wachten.**

Veur de cursus Stellingwarfs veur beginners slaegden 10 cursisten.
Onder hun Sjoukje Wouda, veur 't geval, daj'm nog niet wisten.
Pieternel praot er soms nuver in omme, soms aachterste veuren.
Maar ja, dichterli'jke vrijhied hè, dus et zal wel zo heuren.

**Nao een kot ziekbed overleed Jan Bosma in het veurjaor.
In hem verleuren we een geboren en getogen Hoevenaer.
In zien memoriam ston te lezen:
"Het gezin was groot in het gewone" en daor kuj' trots op wezen.
34 jaor het hi'j bestuurslid west van de iesclub
en mit de taofeltennis was hi'j hier elke deensdag in de pub.
Wat wodt hi'j mist in het dōrp en in zien gezin.
We weensken ze vule kracht, de kiender en Pieterdien.**

In september wodde et hiele dōrp opschrikt deur et overliden van Hendrik Hager van de Vinkegaovaortweg.
Slechts 2 jaor eerder was zien vrouw Jeanette overliden, wat hadde die man een pech.
Vol goede moed zette hi'j deur en leup trouw elke dag over De Hoeve mit zien hond
Tot ok hi'j deur dezelfde ziekte as Jeanette zien einde vond.
Beiden nog gien vuuftig, et kan toch oneerlik lopen in een leven.
We hopen dat de volgende bewoners meer plezier op dit mooie plakken meugen beleven.

**Titie Wagenaar, op 6 november overliden, was altied slim bi'j oons dōrp betrokken.
Nao 20 jaor bi'j de fam. Boonstra woont te hebben, is ze naor Buil vertrokken.
Zeer tegen heur zin, et liefst was ze veur altied in oons dōrpien bleven.
Maar dat was heur toen niet geven.
Gelukkig kwam d'r nao 7 jaor weer een husien veur heur vrij.
Maar jammergenog keerde bi'j heur toen ok het tij.
Want 't geheugen leut heur in de steek en langzamerhaand begon ze de grip op et leven te verliezen.
Wi'j herinneren heur as actief lid van oonze gemeenschap
Betrokken bi'j et hiele dōrpsleven en altied te porren veur een goeie grap.**

Gelukkig hebben we dit jaor ok vrolijker ni'js te melden.
D'r weren oievaars te zien in de velden.
Veurig jaor hadde de schoele mit dizze beesten nog een stunt
Daorvan plokken wi'j now de vruchten, zo aj' heuren kunt.

As eerste spruit van 2011 konden we Sanne verwelkomen van Erik en Precilla, hier tegenover.

Een peer weken laeter ston Rens op zien geboortekaortien as zeerover.

Hi'j is de zeune van Eddy en Suzanne Zeeman uut de Klaeterlaene.

In meie gavven Hendrika en Leo hun zeune an mit Sake Jan as naeme.

Zeg Pieternel, hem' ze op de Jokweg een stroomsteuring had?

De ooievaar mos daar wel drie keer op pad!.

René Hoekstra en Cilia Hogeling kregen een kedo van goud

Mit de geboorte van hun dochter Maud.

Pieternel, ik wodde now toch wel jaloers.

Et was ok raek bi'j Franky en Etske Koers

De voegel laandde op het dak

En bezorgde daar een poppe mit de naeme Karnak.

Kotleden kwam Ellen van Eddie en Lieda Koopman d'r nog bi'j.

En 't is nog niet het ende van de ri'j.

Buten het dörp geboren, maar zeer betrokken bi'j de kórfbalsport.

Komt ok Rona, dochter van Anita en Menno Dolstra in oons repot.

Hé we gaon vot! Beste meensken gegroet!

Wi'j hopen dat et locht et thus niet meer doet.

An mien lief gien polonaise Thomsvaer, gien gezeur

We gaon dus gewoon mit oons verhaeltien deur.

En et was ok niet zo slim.

Want we hadden et nog niet had over oonze Wim.

Moej' es heuren, et kan bijna niet starker.

Hi'j wodde benoemd tot de beste willewarker.

Hi'j gaot veur een protte dingen deur het vuur.

Al meer dan dartig jaor actief in het korfbalbestuur.

En da's niet alles. Ooster Wester en bouwcommissie dorpsuus.

Hi'j is van alle markten thuus.

Zorgt veur continuïteit en verni'jing en is echt wel beroemd.

Hi'j wodde deur Gerard van Klaveren dan ok burgemeester van De Hoeve noemt.

Ja van Klaveren was ontzettend bliede.

Mit zoe'n collega an zien ziede.

We gaon deur, maar dit is minder mooi.

Dit is misdaodig stom geklooi.

D'r is inbreuken op De Hoeve bi'j Hennings en ok bi'j Wim.

Dat is netuurlik arg gemien en ok balen.

Maar bi'j burgemeesters is waorschienlik wel wat te halen.

Now we et toch over de gemiente hebben, de ambtenaren bin echt an et waark west.

Samen mit oold en jong uut De Hoeve deden ze veur een ni'j crossbaentien hun best.

Ja, de Veurmekeerdag van de gemiente is veur oons dörpien een zegen.

Ie kun weer veilig et Hokkien verlaoten en kommen gien onverwaachte hardfietsers meer tegen.

Activiteiten:

Het gebeurde weer.

De Jokweg hadde an et begin van 't jaor stilstaond en langzaam riedend verkeer.

Rommelmart en nat laand.

Dan hol ie et parkeren niet echt in de haand.

De opbrengst was weer naor beheuren.

Daor zuj' oons niet verder over heuren.

D'r was iene bezuker, dat was een grote boffer.

Die kocht zulveren bestek in een koffer.

Veur zeuventig (70) euro was hij de grote heer.

Want een vörke alliend kost al meer.

Dörpsfeest:

Op et dörpsfeest gong De Hoeve weer uut zien bol.
Het was allemaole te dol.
X-factor, spellegies en Gooische vrouwen.
Now, laot die maar sjouwen.
Nao het spetterend optreden op zaoterdag van een Gieterse band.
Kwam er op zundag met de fietstocht en de brunch an het feest een end.

Verkeer:

**Het verkeer op De Hoeve moet volgens de kraante veiliger wodden.
Dat moet mit veraanderen van gedrag en eigenlijk niet mit bodden
Moej'heuren, ze willen de Jokweg ok gaon verbreden.
Daor wordt naemelik te langzaam reden.
Het is netuurlik stom en dat mag nooit gebeuren.
Dat inwoners van De Hoeve zelf te hadde deur de bebouwde kom gaon scheuren.**

Onderwies:

Oonze Gonda van de Klaeter.
Is now ok heufd in De Blesse, alliend gebeurde dat twee jaor laeter.
De skoeleverlaoters op 't Linde College hem et ok goed daon.
We zaggen in de kraante staon.
Dat Hilde Turenhout met de kōrfballers van het Linde College op Mission Olympic in Amsterdam
twiede wodden is.
Pas nao 2x een verlenging gong het in de finale mit strafworpen krek nog mis.

**Nao 34 jaor in Oldelaemer te hebben staon.
Is juf Rosa een ni'je uitdaging angaon.
Utzwaaid mit gaanzebord en een versierde driewieler mit ballonnen.
Is ze as intern begeleidster op de wethoolder Heida schoele begonnen.**

Multifunktioneel centrum:

Veur geld.
Koj'ronties lopen om et veld.
Jong en oold deden d'r an mit.
Et was dan ok een grote hit.
Allemaole bedankt. Geweldig daon.
D'r kwam deur jim inspanning 1500 euro op de teller te staon.

**Ok mit oolde mobieltjes en statiegeld van flessen. Gao et maar verzinnen.
Kwammen er de neudige euro's binnen.
Op het dörpsfeest dit jaor, konden meensken hun diensten anbieten.
Bi'j veurbeeld raemen lappen of een tuuntien wieden.
Degene met het hoogste bod.
Betaelt an et dörpshuus en het van de diensten 't genot.**

Zo mochten Anniek en Femke bi'j Leon en Menno kommen strieken.
En veur 80 euro mochten de mannen daor ok naor kieken.
Maar 80 euro is veur studenten netuurlik een protte geld.
Dus de dienst wodde eerst maar evenpies uutsteld.
Maar gelokkig wun Leon op een nacht.
200 euro in 't Casino, wie hadde dat now verwacht.
Leon, kon zien gelok niet op en het drekt zien moeder beld.
Wat de dames in Grōningen allemaole mossen strieken, da's nooit nooit verteld.

**Ook Rianne en Wietske wollen wel wat doen, raemen lappen bij iene thuus.
Koen meldde hem an mit de koe ruties ende raemen van zien huus.
Mit die schone raemen kan ie weer goed naor buten kieken.
En stel je veur dat die jonge meiden plotseling iets veur hem lieken.**

**Maar toen ze bezig gongen, was het mit die gedachten snel daon.
Want achter die mooie maegies, zag hij naemelik moeder Annie staon.**

Verder wodde d'r een club van vuuftig opricht, om de pot te spekken.
De Hoevenaren hebben wel geld, et bin gien frekken.

Ja, de club van vuuftig, hè.. ja!

Waorum de meensken vuuftig jaor moeten wezen is oons ontgaon.
We snappen dan ok niet hoe Ferencz en Edwin op de lieste kunnen staon.
Maar d'r kan nog wel wat meer bezunigd worden heurden we vertellen
Daarom willen ze een oolde tredisie in ere herstellen.
Iedere bijjenkomst moet op het stencil kommen te staon.
En per e-mail zeggen, a'j d'r naor toe zullen gaon.
Dan goed op het stencil letten,
Wie stoelophaealdienst het, en wanneer a'j je stoel bij de weg moeten zetten.

**Thomasvaer: " et is oflopen jaor in buurt van Kontermans aordig an't veraanderen.
Ze bin manmachtig bezig west om de Lende te laoten meanderen.
Et duurde lange, maar in de harfst was alles zoen bietien klaor.
En hul Henk Roeles geliek een mooie excursie aldaor.
Ie zaggen zulverreigers en ooievaars in de ni'je polder lopen.
Maar sommige boeren mossen et jammer genoeg zuur bekopen.
Wi'j he'm et zelf zien, dus we zullen d'r niet omme liegen.
Jan Hensbergen had grote muuite om zien schaopies op het dreuge te kriegen".**

An de Vinkegavaortweg zit gas.
Dat komt oons allemaole wel van pas.
Wi'j staon d'r echt niet van versteld.
Joan wus et netuurlik, maar wi'j hadden et ok al veurspeld.
Olie en gasbedrijf Vermillion wil gas gaan winnen aan de Vinkegavaartweg in De Hoeve.

**Een gasveld van 100 miljoen kuub.
Zoen 60 bezuukers wollen wel es heuren.
Hoe ien en aander ging gebeuren
't Zakken van de bodem zol maar twie centimeter wezen.
Veur schae hoeft die dus niet te vrezon.**

We gaon now mitmekaere even op bezoek.
En doen dat in de medische hoek.
Op stress, burnout of chronische klachten.
Zit netuurlik gieniene te wachten.
En hebben jow de daarms overstuur.
Dan kuj' bij Jolanda Roelofs terechte veur acupunctuur.

**Manchester is geweldig an et scoren west.
Niet de voetballers, nee ik bedoele Mark van de Esdoorn, die doet et maar best. Duurzaam en
goed ondernemerschap
Dat vienen wi'j geweldig knap.
2009 reïntegratiepries, nee we bin nog lang niet klaor.
In 2010 was Mark ondernemer van het jaor.
In 2011 had ie de beste praktijkopleider van het laand.
Mark, proficiat van dizze kaant.**

Fam. le Duc reisde in oktober naor Zambia veur hun project.
Mit vule materialen en geld geeft hun hulp een protte effect.
Niet veur niks wodden ze goddelijk anschouwd
Want deur hun inbreng wordt d'r steeds een stok bij de schoele anbouwd.
In 13 jaot tied van 33 naor 500 leerlingen
Daor zol de schoele in De Hoeve om staon te springen.
A'j dan zo veer van huus binnen, is een goede buurman een waor genot.

Et oold papier zet hi'j bi'j de weg, zo is dat temienen ok vot.
Jammer dat d'r ok agenda's bijzaten veur de schoele in Afrika.
Die wodden now dus al reclycled veur gebruik, wie doet je dat na.

**Gert van den Berg gong een weke mit collega's in Ghana an et wark.
Dokter in de tropen zoks vienen wi'j geweldig stark.
In Nederland moet een arts steriel in een cleanroom warken.
In Ghana het een opperaosiekaemer echter meer weg van het hokke van een varken.
Toch weten de dokters zich knap deur liesbreuken, malaria en slangebeten henne te slaon.
En kun de patiënten nao een opperaosie weer rap op huus angaon.
As et kon zol Gert het liefst deurgaon mit hulp an deze arme meensken te bieden.
Maar hi'j kwam gelukkig weer terogge, zien eigen gezin moet er ok niet onder lieden.**

Een aandere globetrotter in De Hoeve is dierendokter en adviseur Jan Janssen.
Bedrieven in Litouwen, Rusland, en de hiele wereld geft ie ni'je kansen.
Hij wet hoe aj' mit koenen omme moeten gaon.
Ie moeten ze niet storen, et juuste voer, en ruimte om te staon.
En de boer, die moet niet alliend zien veestaepel beheren.
Maar ok met pesseneel omgaon, moet ie leren.
Meensken wie alles over Janssen en zien beroep leren wil.
Moet maar es kieken in het "melkveemagazine" van 4 april.

Ok een veuruutstrevend man is Frank Olijslager mit zien pluumveeholderi'j.
Zien kiepen kriegen extra ruimte en hem' het label antibioticavri'j.
Hi'j levert dizze kiepen of bi'j Albert Heijn.
Veur Frank wel mooi, maar veur de kiepen minder fijn.

**Naost managers kregen we d'r op De Hoeve ok ni'je artiesten bi'j.
Een koppeltien jonge heren.
Fabian, Casper en Henk Jan waren nao de series op het schoeleplein in Berkoop an het jongleren.
Onder de rekstok deurfietsen, eerst Casper en daorna Henk Jan.
Dat kan ik ok docht Fabian.
Het eerste stok gong meraokels, echt fijn.
Maar even laeter sleug ie stijl achterover op et plein.
Fabian! Eerst nog wat oefenen veurda'j weer jongleert.
En Henk Jan en Casper! Jim moen niet zo hadde lachen as iene zich bezeert.**

**Ok Alle Jan wil wel iens gek doen as het er omme gaot.
Om een balle op te haelen stapte die bi'j Jan de Boer over 't draod.
Niks an de haand. Inienend echter vremde sprongen henne en terogge.
Ja, Alle Jan, mit stroom op de draod gaot et wel twee keer zo vlogge.**

Op de volgende atleet hoeven we ok niet lange te wachten.
Frank Olijslager gong mit de midweek kórfballen in Drachten.
Jannie hadde zien tasse inpakt, maar dat bleek niet zoe'n slimme zet.
Jannie! "Hi'j kan dan wel een kerel mit twee rechter haanden wezen.
Maar dan laoj'hem toch niet mit twee linker schoenen over het sportveld racen".

Veural bi'j de mannen was het slaegd dizze keer.
Want in de leste westried speulde d'r bi'j de tegenstaander een dame mit veur heer.
Hoewel oonze mannen et in de verdediging nog wel es willen verrekken.
Stonnen ze now in de ri'j om dizze dame te "dekken".
Ok nao ofloop waren de mannen niet bi'j dizze dame weg te slaon.
Ze schienen now allemaole mit dizze lady op een foto op Hyves te staon.

**Mooie meiden! Wi'j kennen netuurlik allemoale Doutzen Kroes.
Die is echt niet veur de poes.
Een heer van De Hoeve 1 is bezig heur naor de kroon te stikken.
We gaon zien naeme hier gauw verklikken.**

**Et is jim toch ok niet ontgaon.
Dat Menno de Vries het vaekst op de foto in de kraante kwam te staon.**

Bi'j De Hoeve was er wisseling van de wacht.
Ruben de Jong stond twie jaor an de macht.
Het zuuken het niet lange duurt.
We vunnen een goeie opvolger in de buurt.
Een goeie bekende.
Van de overkaant van de Lende.
In de persoon van Sake Koelma hebben de roodgroenen.
Een trainer om te zoenen.

**Lies Lockhorst was de leading lady van et taofeltennis
Ze gaf daoran leiding met heel vule kennis.
Helaas op dit moment gien tennis meer.
Lies ie kriegen van oons alle eer.**

Guinness Book of Records:

D'r staot een Hoeviger in het Guinness Book of Records
Ja meensken, et was eerst best even schrikken.
Maar et wodde uiteindelik een record om je vingers bi'j of te likken
Veur een vrijwilliger kan et eigenlijk nooit uut.
Daorum kriegt ie van oons een dikke tuut.
Maar liefst 48 kratten bier.
Kwammen in iene rit naor hier.
Wat veur een auto? Oh, et staot hier te lezen.
Dat moet een Opel SABIERA wezen.

Bi'j de k rftbalclub weren ze wel vaeker bliede.
De volgende ploegen speulden zeer solide.
Ze wodden allemaole kampioen.
Daor was deur de tegenstaanders niks meer an te doen.
Ze wodden hier deur oons vermeld.
A1, B1, C1, F1 en senioren 4 kampioen op het veld.
We hebben in de k rftbalkraanten zitten neuzen.
En zaggen dat Astrid Logtenberg in de Friese A selectie is keuzen
Mit het noemen van A1, C1 en senioren 2 in de zaal.
Hebben we ze, van harte feliciteerd, allemaal.

**Deensdags wodt er ok actief sport bedreven in et Hokkien
Dan zie 'j allien maar mannen mit drie ballen en een stokkien.
Ze hadden een spannende stried dit jaor.
Maar Willem Boertje was as eerste klaar.
D'r was echt niks meer an te doen
Hi'j was de echte biljartkampioen.**

Marvin Geertsma en Erik Olijslager hem'n veur de k rftbalclub hun best daon
Reken maar dat die twie hun mannegien staon.
Een mooie teamauto hebben ze ontw rpen, maar hiel jammer heur.
Niet genog stemmen en de pret gong niet deur.
Erik is niet veur ien gat te vangen en gaot binnenkort ni'je plannen ontvouwen.
Hi'j is now naemelik van plan de auto van Annigje of Edwin Roersma omme te bouwen.

**Tiedens de seizoensofsluting, "de campingaovond", van de Hoelifans was het een reuze feest.
Veural as Yvonne de Vries tiedens de Bingo de getallen veurleest.
De vekaansiegangers bin concentreerd bezig mit zien allen.
Want wanneer zol veur hun now es de "Bingo" vallen?
Dan plots wordt het stille in de zael, en dan liggen de vekaansiegangers van 't lachen krom.
Want roept Yvonne daor niet het getal 99 om?**

**Yvonne, luuster, de bingo kan nooit op nummer 99 vallen.
Want het spellegien warkt kent niet meer dan 75 getallen.**

Teniel:

Ok het teniel dee dit jaor weer van zich spreken.
Het was een slim raer verhaol waor we naoar keken.
Zeerovers, zigeunermaegies en "snoepies" op teniel, en een stok geraos.
We zagen ok nog Napoleon, een bajesklant en de Sunderklaos.
Is Blessie now een bajesklant, ontvoerder, agent, of toch gewoon een peerd?
Daj' niet op de eerste indrok of moeten gaoan, dat hebben we wel leerd.
Ans, 't lief gruun blattien van Napoleon, och wat charmant.
Vul dankzi'j Blessie op het lest as ontvoerster toch nog deur de mand.

Ook dit jaor is er weer een prachtig stok instudeerd, dat doet blieken.
Aj'een mooi stok willen zien, moej' dan ok kommen kieken.
Op 13 en 14 jannewaori hangt "Moeke aan de rekstok".
Snel boeken, want et wordt ontzettend drok.

Koor:

**Mit Liesbeth Wijngaarden as dirigent.
Woj' as koor toch maar mooi verwend.
In 't veurjaor bin ze naor Oosterwolde veur een optreden bi'j Tity gaon.
Om vervolgens in Zwolle veur Gineke Punter, dochter van Anne en Martha, klaor te staon.
Op 20 meie was er daornao in t Hokkien een optreden mit zien allen.
En in december leuten ze op een Kerstspecial de kurken knallen.
Liesbeth het oons koor een protte leert, maar we moeten ok een traontien laoten.
Want ze het et te drok en gaot het koor verlaoten.
Uut Stienwiek komt mit feberwaori Angelica Braam
En het 't koor opni'j een dirigente van naam.**

Dorpsgenoten:

Jan en Mireille Janssen hebben twie bizondere katten: Frits en Siep.
Van moezen heur ie daor gien gepiep.
An de Jokweg stonnen de poesen tegen fietsers te zwaaien.
Om zich darnao te laoten aaien.
Frits wodde scheert mit een ni'je tondeuse.
Daordeur veraanderde hi'j reuze.
Frits ziet er now uut as een poedel.
Lieve Jan ze maeken van jow toch gien Jan Doedel.

**Is dit eigenlijk wel bekend?
Bestuursleden van Plaetselik Belang gongen naor oons parlement.
Ze waren en dat moeten jim beslist weten.
Mit twiede kaemerleden aan 't speeddaten.
Et gong over jongeren, leven, wonen en warken op het plattelaand.
Maar daarvan hebben ze, mit uitzondering van Luts Jacobi, toch gien verstaand.**

Nao et vienden van 100 miljoen kuub gas.
Is er op de hoek van De Hoeve ok weer drokte op het terras.
Mit ijs, thee en koffie mit gebak weet Fred zien gasten te boeien
Om straks tot bedde en broggien uut te groeien.

**Ok op Kontermans bi'j Trienke was drokte dizze zoemer, hebben jim dat wel heurd?
Ja, 't is raer zeggen, maar et is toch echt gebeurd.
Ongevraagd kreeg ze een koppel Drenten op de koffie, ja et is echt waor.
Maar Trienke, jim kennen heur, ston drekt veur ze klaor.
Bin Jeen en Trienke dan ok in de horeca belaad?
Nee, d'r was iets anders an de haand.
An et einde van het bezoekje van de dames bleek pas**

Ze mienen naemli'jk; we zitten bi'j Henk en Hilde op et terras.

Ok Klaske Hoekstra mit een interview in "Praot mar raek" mocht er wezen.
In de Stellingwerf was tussen de regels deur telezen
Wat veur een lief en bescheiden maegien Klaske toch mocht wezen.
Mit een miljoen zol ze heur familie leden verblijden.
En heur levensmotto is: dat iederiene een lang en gelokkig leven mag leiden.

**12 ½ jaor in dienst bi'j dezelfde baos, et komt haost niet meer veur.
Maar Mark Slager het et haelt en zien collega's stonnen 's naachts bi'j him veur de deur.
Hi'j moest eenparcours op een mini-bike ofleggen
En och ja, wat zuwwe d'r verder van zeggen.
Een schitterend taffereel
Was zien rit as sjeik op een kameel.**

Hennie Bakker het een elektrische fiets, die ze graeg mag bruken.
Op een dag wol ze veur bosschoppen de "Super de Boer" induken.
Mit de fiets op pad gaon.
Kwam ze veur een dichte deure te staon.
't Is waor ok, ze waren de winkel an et verbouwen.
Dus daarom waren die bouwvakkers daar zo an 't sjouwen.

**Ok dit jaor het de gruncommissie ontzettend zien best daon.
En kwammen d'r vule zunnegies in de tunen te staon.
Marita wodde eerder ok mit zoen anmoedigings zunnegien verwend.
Naodeel is dat iederiene je dan ok kent.
De reclamebezorgers hadden geliek een zwaore klus.
En gooiden bi'j Marita vier Intratuin folders in de bus.
En hoe is et gaon mit de winnaars van dit jaor?
Stond Intratuin ook veur jim mit een zak vol folders klaor?**

Harm en Froukje bin et afgelopen jaor hier in et karkien trouwd,
En ze hebben bi'j Pieter Poot een mooi feesien bouwd.
Ze kregen twie jonge biggies zoas jim weten
En daar zitten ze now al maonden van te eten.
De hele tuun is ommeploegd en beheurlik nat
Dus liefhebbers, ie kun hier terechte veur een modderbad.

**Oonze butenlaandmedewarkers hebben oons bericht.
Dat Menno en Wilco in Bratislava argens van bin beticht.
Volgens de plaatselike pelisie weren ze an 't graffitispuiten
Dan gao je boekien wel te buiten.
Ze hadden wel wat in de haand en spuiten deden ze ok wel
Maar dat noem ie wildplassen en daorveur hoef ie niet in de cel.**

Arjen is nao 11 maonden uut et butenlaand terogge keerd
En zo te zien het hi'j zich hier niet altied scheert.
Sanne was naor de Nederlandse Antillen
Dat zollen jim zeker ok wel willen.
En Rianne is uut Suriname ok weer terogge op et oolde nust.
En zo hebben alle oolders ok weer rust.

**Ik wil ok nog even het volgende melden.
De veurzitter van de korfbalclub die het een Tomtom mit daorin alle kórfbalvelden.
't Reizen wodt dan een fluitien van een cent.
Want zoen apperaat is heel intelligent.
Ie moeten je echter niet vergissen.
Aj'staon te pissen.
Mit zoen ding op de wc.**

**Dat is beslist geen goed idee.
Hi'j schrok zich dan ok vreselik rot.
Toen et brobbelde vanonder uut de pot:
"Keer omme en pak een dreg.
Ik ligge in de Ni'je Waterweg".**

Wi'j meugen eigenlijk niet uut de schoelekraante klappen.
Maar wat moej' a'j in Heerenveen gaon stappen.
As jow een agent as stage-loper zien? Klaas Anne !.
Dan krieg ie toch evenpies onder uut de panne.
Volgens de berichten kwammen ze Geert ok al een keer over et mat.
Et is ok wat in 't Vene, mit die heilige Hermandad.

**Eeltje gaot as supporter regelmaotig naor Heerenveen, zien cluppien.
En in het stadion zit ie nooit in je uppien.
Heerenveen wun mit 3-0,de stemming was dus opperbest.
Maar toen ze bi'j de auto kwammen was dat rap verpest.
Linda was iets eerder votgaon.
Maar waarom hadde ze een briefien onder de rutenwisser daon.
Wat was now et geval?
Een bon van 70 euro, dat vun Eeltje wel wat Eeltje mal.**

Gauw Linda evenpies bellen: " hoe is et jow vergaon"?
"k Was nog niet weg, mien auto moet er nog staon".
Dat was echter niet et geval.
Het verhael wodt opni'j arg mal.
Laeter op de dag kwam er een tillefoontien. Ze kon de auto weer haelen.
Maar mos veur et wegslepen wel 189 euro betaelen.

**Et is gebeurt.
Beste meensken we gaon d'r uut.
En doen dat mit een limerick as besluit.**

Dit peer uut De Hoeve en echt niet uut Drouwen.
Wil jim an 't ende van de toespraak nog iets belangrieks toevertrouwen.
Dit wollen we nog evenpies kwiet.
't Is now toch wel de hoogste tied.
Om mit mekaander het ni'je dorpshuus te gaon bouwen.